

1 Tesalonicenses

Pablo hōr oshim Porrosht aabo saludo.

1 ¹Yok Pablo. Silvano hn Timoteo ode pahir. Oyichew ana hutita par uje oyosim olak uje olak Porrosht aabo uje ebuhulichi dit Tesalónica. Porrosht wichi uu olak Deych. Hn Jesucristo wichi olak Irhīch. Sehe oyuhu Porrosht dosir olak hn duhu olak aho kiis.

Porrosht aabo tyenij ye olotiis ir ahwospe.

²Shish oyina Porrosht par nos wir olak. Shish ōryok eyucha olak uje ōryok orar oyapur Porrosht. ³Shish oyitim Porrosht uje ahakōrlo pork ye otiislo eyok Deych Porrosht. Ōryok eyucha uje ahmūrlo yewo hn akashimlo ōr. Ōryok eyucha uje shish olak ewenta erze uje prowa olak shi pork erahalo uje eyok owich de Porrosht ahir pork eyok Irhīch Jesucristo ishi eyok hnitewihi Porrosht ahirkite. ⁴Pishibo watsaklo, Porrosht sahmūr olak. Oyiraha uje ire chiihla olakkite ⁵pork uje oyanimirāha Porrosht ahwoso oyitim olakni ich erahalo uje ye shi ōryok ahwospe. Porrosht ukurbo iya toy hn ir ichibich chish obiyoho olak aho toy. Wichi shuu erahalo lahwoso uje oyitim olak ich ūru. Erahalo ōryok uje oyebuhu olak ahir ich oiyiyokōr uje om.

⁶Olak eētlo uje oiyiyokōrni, hn eētlo eyok Irhīchpo. Uje entlo Porrosht ahwoso wapni ich yewo oshiyokōr mihnikīhi olak oshuu olak dospa per Porrosht ichibich shuu olak ayipa. ⁷Uje ahakōrlo uhulo itsorzni ich erze Porrosht aabo uje odebuhu wahacha hnimich Macedonia hn hnimich Acaya ochunt uje ahakōrlo hn oshiyokōr otseēt olak. ⁸Erze eyok Irhīch ahwoso uje tāra olak hn oso otatimye ye shi hnimich Macedonia hn hnimich Acayape. Nos chūr lekitiyo. Nos oso lekitiyo ochiraha olak uje ye otiislo Porroshtpe. Heke uje oyitir wahachni ich ye nesit latik uje oyitim erze oso uje ode lekitiyo pork nos oso ochiraha. ⁹Otatimyeche lekitiyo uje oyaachihichis olak dit wapni ich ahmūrlo ōryok. Otatimye uje erze kojano po uje ehn eeychāhaloni eeylo olak porroshtihī ich moymloni par uje ahakōrlo erze ir ibiyo ese Porrosht pisht uje ich ūru hn ika. ¹⁰Erze oso shish otatimye uje olak shish anemlo Porrosht Ijit pisht uje tyenij

cheeshpo nehe tãra poõrc. Wichi Jesús uje Porrosht shuu ikponi. Wichi Jesús uje ishi eyok hnitewihi Porrosht ahirkite par uje ye yitĩr urhuta bahluta etet nehe.

Pablo chish obiyoho Tesalonicani.

2 ¹Pishibo watsaklo, erahalo uje ehn oyekirihi olakni hn oyanimirãha Porrosht ahwoso ich tokole om pork ye otiislope. ²Uje ehn yahpaa oyitĩr olak ich oyitĩr ese dit Filipos wap. Oso uje ode wahacha oloter õryok hn ochiyuhu lahwoso mihnuwõho oryõkpo. Erahalo uje itsorz. Per Porrosht takashim õryok, heke uje oyitĩr olakni ich ye oyitilpe uje oyitim olak uje Jesús ishi olak hnitewihi Porrosht ahirkite. Wir odechi olak dit uje sehe onontew õryok per ye õr pwelpe ³pork ye oyanimirãha õryok ukushiĩpe. Uje oyanimirãha Porrosht ahwoso ich ye oyiyokõr oyuhu itsorz par uje oyishew timcher, hn ye par uje oyehnyer olak. ⁴Porrosht chiihla õryok par uje oyitim oso ir ahwoso. Oyitim oso uje Cristo ishi õr hnitewihi Porrosht ahirkite. Ye oyiyokõrpe par uje oyuhu oso otsahmür õryok. Shi oyiyokõr pork Porrosht sahmür uje oyiyokõrãha õr oyuhu itsorz. Porrosht wichi uje prowa kimiji dish uje õryok aho mihnũwo. ⁵Erahalo uje yelij oyiita õryok ahwoso uje ich ihĩrts pisho shi par uje oyuhu asimlo õryok olak kuche. Yelij õryok aho yũhirsh par uje oyuhu asimlo õryok olak hnote. Porrosht chiraha erze õryok ahwoso uje oyitim olak ich ũru. ⁶Yelij oyiyokõr kuche shi par uje oyuhu oso otata uje õryok iluu ich om hnii par uje ebitilo uje õryok iluu om, hnii par uje erze oso yewo ochibite uje itsorz. ⁷Õryok Cristo ir apõstole, kirẽhe oyahmür ich oyuhu akashimlo õryok kuche per ye oyapur olakpe. Shish oyinte olak. Shi oyuhu õryok itso timcharrza uje tibey deyjit. ⁸Uje õryok de olak ahirni ich oyahmür pishi olak. Shi oyitim olak uje Jesucristo ishi eyok hnitewihi Porrosht ahirkite, hn oyosim õryok olak par uje oyakashim olak. Oyiyokõr oyuhu itsorz shi pork oyahmür olak. ⁹Pishibo watsaklo, olak eyucha uje ehn oyiyokõrãha Porrosht ahwoso oyitim olakni uje Jesucristo ishi eyok hnitewihi Porrosht ahirkite ich oyishew obiyo toy ich oyiyuhu õryok par oyerz hnote par uje oyiya õryok poso. Oyishew obiyo deeych hn dihak par uje ye oyapur olak posope. ¹⁰Olak uje ye otiislo Jesuspe uje õryok de olak ahirni ich amlo uje oyiyokõr hn Porrosht itspo umponi. Shi oyiyokõr uje Porrosht sahmür hn oyiyokõr uje ich om. Oso ye õr pwele õr denunsya õryok pork ye oyiyokõrpe uje mĩhnik. ¹¹Erahalo uje shish oyakit olak nohmĩr nohmĩr shi itso hnakĩrbich uje sakit deyjit. ¹²Shish oyakit olak par uje shish ma ahmürlo Porrosht hn oyitim olak par uje ahakõrlo uje ire sahmür. Olak Porrosht aabo heke om uje ahakõrlo uje Porrosht aabo oshiyokõr. Porrosht chiihla olak hn shuu amsahalo par ire aabo hn tyenij ishĩm olak erze kuche uje de ire ahĩr nehe. ¹³Shish oyina Porrosht pork ahmürlo uje oyitim olak. Erahalo erze õr ahwoso wir ye

tāra hnakirbope. Shi tāra Porrosht heke shish shuu olak iluu ma om pork ye otiislo Jesuspe. ¹⁴Pishibo watsaklo, shi pork ye otiislo Porroshtpe heke olak ihnapso oshiyokōr mihnikīhi olak shi itso uu Porrosht aabo uje ode wahacha hnimich Judea, ōr ihnapso oshiyokōr mihnikīhi ōrni. Wir israel oso. ¹⁵Wir uje oshuu eyok Irhīch Jesuskite hn uu ōr poruwo wishī oshuu uu profeta poruwo wishī. Wir israel oso uje otsahna ōryok. Wir uje ye oniyokōrpe uje Porrosht sahmūr. Ich otsitak nos wir dihipo. ¹⁶Heke shish sehe onontew ōryok par uje ye oyitīm erze dihipo kināho ōr Porrosht ahwoso uje Jesús ishī ōr hnitewihī Porrosht ahīrkite par uje omasaha par Porrosht aabo. Shish oshiyokōr uje ich mihnūwo. Terihī uhurc heke ele ahle ich Porrosht sepyēr ōr ich shuu dospa.

Pablo sehe tekirihī Porrosht aabopo uje ode Tesalónica.

¹⁷Pishibo watsaklo, uje oso oshuu oyitokolihī olak ahīrni ich shish sehe oyeeshī shichish. Ye ōryok pwele oyumo olakpe per shish ōryok eyucha olak. Shish sehe oyeeshī par uje oyeychīm olak per ich ye ōryok pwelpe. ¹⁸Ōryok sehe oyuko oyitīr olak. Yok Pablo. Shish sehe takaha par uje titīr olak per Satanás sontew ōryok. ¹⁹Uje eyok Irhīch Jesucristo cheeshpo nehe ich eyok dechī ir ikich. Ōryok aylehe wahacha pork ye otiislo erze Porrosht ahwoso uje oyitīm olakni, heke oyitīm Cristo nehe uje olak ye otiislo ir ahwoso uje oyitīm olakni. ²⁰Uje olak dechī nehe ich shuu ōryok aylpa.

3 ¹Shish ōryok eyuwo tisīrīhi olak nehech ye ōryok ewentpe uje ye oyiraha kimīji shish ye otiislo Jesuspe. Heke oyībīte par uje oyiyakahachis ese dīt Atenas ²hn oyuhu Timoteo hno tīr olak. Wichī eyoklo leshap pork wichī Porrosht aap hn ir ibik toy. Ire sanimirāha Porrosht ahwoso tatīm ōr uje Cristo ishī ōr hnitewihī Porrosht ahīrkite. Oyuhu Timoteo hno par uje sakīt olak par uje ma ye duhu otiislo Porrosht ahwoso hn par uje duhu ahakōrlo uje Porrosht sahmūr ³par uje deeych yet nehe uje mihnūwo tīr olak hnii olak nohmira ye moymlo erze Porrosht ahwoso. Ich erahalo erze kuche mihnūwo tyenij oshiyokōrīhi eyoklo. ⁴Uje ehn ōryok dechī olak ahīrni ich shish oyitīm olak uje tyenij oshiyokōr kuche mihnuwōho olak hn tokole itsorz. Ich erahalo uje itsorz. ⁵Uje ehn ōryok eyuwo tisīr uje ye oyunt latikīhi olakpe ich oyuhu ōryok ihyēt yet hno par uje tīr olak. Sehe oyiraha kimīji shish ye otiislo Porroshtpe. Oyiraha uje Satanás sehe niyokōr kuchēr̄k par uje shuu moymlo erze ahwoso uje oyitīm olak hn shuu moymlo Jesucristo. Kimīji wichī derz ich tyenij tokole uje ōryok ibiyo ye jukur.

⁶Per ele ahle hn Timoteo ich taachīhi lika ōryok ahīr. Tāra wahacha Tesalónica uje olak de. Tatīm ōryok erze ahwoso ihīrtso uje ye otiislo Porroshtpe. Shish ahmūrlo Porrosht. Tatīm ōryok uje shish olak eyucha ōryok hn shish sehe eychīmlo ōryok. Ōryok itspo, sehe oyeychīm olak.

7Pishibo watsaklo, kuche mihñüwo shish de ñrmo hn oso oshiyokör mihñuwōho oryök toy per uje oyunt uje Timoteo tatim öryok uje yesh ye otiislo Jesuspe ich shuu öryok aylpa. 8Ele ahle ich öryok aho kiispa pork olak shish ye otiislo eyok Irhichpe. 9Oyina Porrosht uje olak itsorz pork shish uhulo öryok ayla. Porrosht umo uje itsorz. 10Deeych hn dihlak shish öryok orar oyapur Porrosht par uje öryok pwele oyekirihi olakpo nehe par uje oiyikoräha olak erze uje ye erahalo par uje ma ye otiislo Porrosht.

11Oyapur Porrosht uu eyok Deych hn oyapur uu eyok Irhich Jesús par uje takashim öryok par uje öryok pwele oyuko oyitir olak. 12Oyapur eyok Irhich par uje ma duhu ahmürloye hn ahmürlo erze yewo toy uhu ilo uje oyahmür olak 13par uje Porrosht takashim olak hn ye olak koswäha ire hn ahakörlo uje ire sahmür. Deeych yet nehe uje eyok Irhich Jesús cheeshpo hn nos wir Porrosht aabo uje otoni öya ire. Olak dechi toy Porrosht ile ikich. Nihyok kuche mihñüwo olak aho. Shi olak iluu om eyok Deych Porrosht ile ikich.

Porrosht sahmür uje ir aabo oshiyokör.

4 1Pishibo watsaklo, ërlo öryok. Oiyikoräha olakni erze uje tyenij ahakörlo uje Porrosht sahmür hn shish ahakörlo uhulo ilorz. Ele ahle eyok Irhich Jesús shuu oyitim olak par uje ma ahakörlo uhulo itsorz. 2Erahalo erze eyok Irhich Jesús ir ahwoso uje ire shuu oiyikoräha olakni. 3Porrosht ye nahmürpe uje yiyokörlo uje mihnik. Ich om uje hnakirbich umuhu nerähta ahir hn ich ompo uje timcharrza umuhu dabich ahir per ich mihnik uje ye ohnoyhi pishye ahirpe hn shi omuhuye ahir. Ich mihnik uje otorähaye. Ich mihnik uje timcher timcher öhyi yër ahir. Ich mihnik uje hnakirbo hnakirbo öhyiye ahir. Ich mihnik uje yeëk sahat loshipit. Ich mihnik uje yanak shuu loshipit sahat ire. Ich mihnik uje pikihñino hn pikihñine oshiyokörhiye oshuu itsorz toy. 4Oyitim olak oyuhu itsorz pork kal olak nohmira tyenij chiraha uje ich om par teyäha nerähta pishta hn shiyokör shuu itsorz. Ye ompe shi hnoy wate hn ye tatim iisope. Ich shiyokör uje mihnik. 5Ye ompe shi teychim timcharrza hn duhu deyuwo mihñüwo hn hnoy wate par ir irähto itso erze oso uje ye odiraha Porroshtpe oshiyokör oshuu itsorz. 6Ye ompe Porrosht aabo uje yeëk iyuwe erze Porrosht ahwoso hn shi sehnyër Porrosht aabo yewo hn toräha nerähta o toräha dabich pork eyok Irhich tyenij nos sepyër erze oso uje oshiyokör oshuu itsorz. Wir erze Porrosht ahwoso uje shish oyitim olakni. 7Porrosht ye diihla eyokloni par uje yiyokörlo uje mihñüwo. Chiihla eyokloni par uje yiyokörlo uje ich om. 8Heke kimiji yeëk chihü uje ye nahmür uje oiyikoräha olak ich sitak öryok. Per ye ditak oryökpe, wichi sitak Porrosht pork erze ör ahwoso uje oyiita shi tära Porrosht. Wichi uje ishim eyok Dechibich uje yelij niyokör mihnik.

⁹Oyitim olak uje Porrosht aabo tyenij otsahmürnye, per ye nesita par uje oyitim ma oyuhu itsorz pork oyiraha uje Porrosht shiyokoräha olak par uje ahmürloye. ¹⁰Ich imeheeych itsorz pork shish nos ahmürlo erze Porrosht aabo yewo uje ode wahacha Macedonia. Pishibo watsaklo, oyitim olak par uje shish ma ahmürlo ör. ¹¹Shish uhulo olak aho kiis, hn ahakörlo olak ibiyo, hn ye alilo olak deshibo ör ibiyo ikiyo. Wir uje oyitim olakni ¹²par uje uhulo erze uje ye ör Porrosht aabo ochiraha uje olak iluu ich om hn par uje olak pwele eylo uje olak nesita par uje ye efirlo erze uje ye ör Porrosht aabo hn apurlo ör poso.

Jesús tyenij cheeshpo nehe.

¹³Pishibo watsaklo, ich ye ompe uje ye erahalo uje Porrosht shiyokör nehe par daabo uje otoni. Ye ompe uje eyerhlopa ahlilo ör hn uhu olak dosdarak itso erze uje ye odiraha Porroshtpe. Wir losuhlaabo pork nihyok ör owich wahacha Porrosht ahir. ¹⁴Yirahalo uje Jesús toni hn Porrosht shuu ikpo heke yirahalo uje Porrosht tyenij shuu erze uje otoni uje ye olotiis irpe öya Jesús uje ire cheeshpo nehe. ¹⁵Erze uje oyitim olak wir uje eyok Irhich tatni. Eyok uje yesh eyok ikaha nahu irmo uje eyok Irhich cheeshpo nehe ye yiyeebepe hn wir otsehe eyok nör erze Porrosht aabo uje otoni. ¹⁶Deeych yet nehe hn eyok Irhich tokolihi wahacha poör par uje ihnimich hn tibich jwertpa hn ese anjele ör bahlut wichi tibich toy hn yeek sobita Porrosht ir trompeta. Wap erze topo uje ye olotiis Cristope tyenij ör ikpo. ¹⁷Porrosht tyenij seem eyok uje yesh eyok ika hn erze ir aabo uje ör ikpo hn hnoy eyoklo seya eyok Irhich ahir poör pehet wahacha ukuhurra eeych hn par uje shish yiyakahalo ahir. ¹⁸Atimlo ör erze ahwoso uje oyitim olakike par uje uhulo ör aho kiis erze uje ohye topo.

5 ¹Pishibo watsaklo, ye nesit latik par uje oyitim olak par uje erahalo latik nehe hn Jesús cheeshpo. ²Ese deeych uje eyok Irhich cheeshpo nehe ich shi itso echikit uje taachihä dihlak. Ye erahalo ortpe. ³Uje oso otata uje ye latik teye hn ich nos ör aho kiispa ich tyenij mihnik tir ör shichish shi itso uje timcharrza chuuna ire uje ich ta par ijit shürha. Ich dospa per ye pwele duhu erze ir dosiryo sehepe. Erze mihnüwo tyenij tir erze oso nehe shuu itsorz. ⁴Pishibo watsaklo, olak ye olak ilo örpe. Wir ye odiraha Porroshtpe. Shi ör itso uje odirkihä dihlak. Olak Porrosht aabo. Erahalo ishirit uje Cristo cheeshpo nehe, heke ye taräha olak hnimichpe shuu as olak ibe shi itso uje echikit taächa. Per ye erahalo deeychtikihä uje Cristo taächa. ⁵Nos erahalo Jesús ir iluu shi itso uje luu chihit olak hn shi itso uje deeych chihit olak. Ye eyok ilo erze uje ye odiraha Porroshtpe. Wir shi ör itso uje odirkihä dihlelta. ⁶Heke ye ompe yiyokörlo yuhulo itso erze uje ye odiraha Porroshtpe. Wir shi ör itso uje omo mahn eyok shi eyok itso uje yirihilo. Kimiji yiyokörlo uje mihnik ich

shi itso uje yumulo hn itso uje yikich seyhi eyok. ⁷Erze uje ye odiraha Porroshtpe shi òr itso uje omo dìhlak hn shi òr itso uje dìhlak hn yikich seyhi òr. ⁸Per eyok uje yiraha Porrosht ich shi itso uje deeych chihit eyok heke ye ompe uje yuhu eyok itso uje yikich seyhi eyok itso òr. Uje ye yotiislo Porroshtpe hn yahmürloye hn yahmürlo yewo ich eyok itso ohyerptosht uje chibite fyerit derjorrza par tibey ire. Hn uje yelij yikeylo uje eyoklo owich de Porrosht ahir ich shi eyoklo itso ohyerptosht uje iyàha dolt par uje tibey ire. ⁹Porrosht ye dibitpe par uje yitìrlo urhuta bahluta etet nehe. Chibite par uje tyenij yaachihilo ir ahir nehe shi pork ye yotiislo eyok Irhìch Jesucristope. ¹⁰Ire tooho eyokkite heke kimiji yitilo nehe o kimiji ye yitilope per je deeych yet nehe ich yebuhulo Cristo ahir. ¹¹Erze uje oyitim olakike ich tyenij atimlo erze Porrosht aabo yewo toy par uje uhulo òr aho kiis. Atimlo òr par uje ma ye olotiis Porrosht uhulo itso uje yesh ahakòrlo.

Porrosht aabo tyenij otola ir bahluwo.

¹²Pishìbo watsaklo, oyitim olak par uje atililo erze olak bahluwo uje Porrosht chibite òr par uje otibey olak pork olak Porrosht aabo. Wir uje tyenij otsakit olak. ¹³Ahakòrlo uje otata hn ahmürlo òr. Erze obiyo uje wir oshiyokòr ich ihirtso pisho. Nos uhulo olak aho kiisihìye. ¹⁴Pishìbo watsaklo, oyitim olak par uje akitulo erze uje ye onahmür odishew obiyo pe par uje odishew obiyo. Atimlo erze uje òr dosdarak par uje uhulo òr aho kiis. Akashimlo erze uje hnii omasaha par Porrosht aabo par uje ma ye olotiis ire, hn shish enthilo oso. ¹⁵Abeylship olak. Uje yeèk shiyokòr mihnikìhi leshibich ich ye diyuhu labahat. Shish ahakòrlo omihìye hn ahakòrlo om par nos wir oso toy. ¹⁶Shish uhu olak aho kiis, ¹⁷hn shish olak orar apurlo Porrosht. ¹⁸Shish asimlo Porrosht hnechit par nos wir kuche pork Porrosht sahmür uje itsorz pork olak ye otiislo Jesucristope. ¹⁹Ye ontìlo Porrosht Ichibich ir ibiyo uhulo itso uje yeèk sèhi jwekita. ²⁰Ye athilo uje ye jukur erze profeta ir ahwoso. ²¹Nos uhulo olak eyuwo tisir kimiji ich ùru erze uje otata o kimiji ye ùrpe. Erze uje ich ùru wir par olak. ²²Nos ahamlo wir kuche mihnùwo. ²³Porrosht wichi uje shuu oso òr aho kiis. Sehe oyuhu nos diyuhu erze mihnùwo uje de olak aho. Sehe oyuhu ire nuhrù erze olak iluu mihnù uje de olak aho. Sehe oyuhu Porrosht tibey olak ichibiyo hn olak eyuwo hn olak yùhur. Uje tibey olak itsorz hn uje eyok Irhìch Jesucristo cheeshpo nehe ich nìhyok uje mihnik de olak. ²⁴Porrosht wichi uje chiihla olak par uje amsahalo par ir aabo. Wichi shish shiyokòr uje ire tata heke tibey olak aho par uje shuu om.

Pablo ishim òr saludo.

²⁵Pishìbo watsaklo, sehe oyuhu olak orar apurlo Porrosht par uje takashim òryok. ²⁶Nos asimlo Porrosht aabo yewo òr saludo hn ekulo òr

ũr uhulo itso uje etĩloye. ²⁷Eyok İrhĩch shuu titim olak par uje olak ler ana hutita par uje nos wir Porrosht aabo otẽ. ²⁸Sehe oyuhu eyok İrhĩch Jesucristo dosir olak.